

iVakadinadina nei ETHAN

Mai vei Larry Hiller

Yavutaki ena italanoa dina

“Listen, listen. The Holy Ghost will whisper. Listen, listen to the still small voice” (Children’s Songbook, 106).

A dabe toka o Ethan ena gauna ni aveiwasei ka raica voli ni sa tukuna o Sam, na nona itokani vinaka duadua na nona ivakadinadina. A waraka toka na nona gauna na nona itokani o Sarah. A tukuna o Sam me baleta e dua na itavi veivukei e vakayacora. E kaya o koya ni tiko vua e dua na ivakadinadina ni veiqaravi. A tukuna na nona ivakadinadina o Sarah me baleta na matavuvale. A tukuna talega na nona ivakadinadina na qasenivuli nei Ethan. A vosa o koya me baleta na caka-caka ni valetabu. Era a vakadinadinataka taucoko ni sa dina na Lotu. Kena irairai e vaka me tiko na nodra ivakadinadina na tamata kece vakavo ga o Ethan.

“Na ivakadinadina ni cava e tiko vei au?” A vakasama voli o Ethan.

A vakasamataka lesu o koya e vica na yabaki ki na gauna a papitaiso kina o koya kei ira na nona itokani. O nona qasenivuli ni Lalai, o Sisita Calder, a vosa me baleta na Yalo Tabu.

“Na Yalo Tabu sa rawa ni solia vei iko e dua na veivakilai mosimosi ena lomamu. Sa rawa ni vukei iko o Koya mo kila na ka dina,” a kaya o koya. “Ka

Kena irairai e vaka me tiko na nodra ivakadinadina na tamata kece vakavo ga o Ethan.



sai koya oya na sala o rawata kina e dua na ivakadinadina ni ka o vakadinata.”

A tovolea o Ethan me cakava na ka sa dodonu me rawa vua ni vakila na Yalo Tabu. A wilika o koya na ivolanikalou ka masu. Ia a sega ni rawata o koya na veivakilai mosimosi oya era tukuna voli na tamata. Sa kena ibalebale li oya ni sega ni tiko vua e dua na ivakadinadina?

A coba na taro oqo ki na qavokavoka nei Ethan ena siga taucoko ka tarava. A se vakasamataka voli ga o koya ni rau a vaqiqi voli kei Sam ni oti na vuli. A vakananuma o koya na iwalewale me na tarogi Sam kina me baleta na ka oya.

“E, Sam,” a qai taroga o Ethan, “o a rere li ena gauna o tukuna kina na nomu ivakadinadina e nanao?”

A lade tani mai na nona ka ni vaqiqi o Sam ka lako ki na veico. “Sega dina sara,” a kaya o koya, ni dabe sobu. “Au a wasea na noqu ivakadinadina ena bogi ni matavuvale sa oti.”

A tomani koya o Ethan ka biuta na nona ka ni vaqiqi e sagana. “Ia o kila vakacava ni a tiko vei iko e dua na ivakadinadina?”

“Oi, au a masu kau a loma vinaka kina.”

A deguvacu vakamalua o Ethan ka wirica e dua na yava ni qiqi ena ligana. E a vinakata sara talega o

koya me vakila na ka vata oya.

Ena bogi oya, ni sa buto ka vagagalu na vale, a tekiduru ena yasa ni nona loga o Ethan me masu.

“Tamaqu Vakalomalagi,” a kaya o koya, “yalovinaka vukei au me dua na noqu ivakadinadina. Vukei au meu kila ni sa dina na Lotu. Ni a parofita o Josefa Simici. Ka ni sa dina na iVola i Momani.”

Ena lomadonu ni nona masu, a cegu o Ethan. A vakasama ena dua na miniti. Ka qai tarogi koya vakaikoya, “Isa, au sa kila rawa li e dua na ka?”

E a qai ovici koya e dua na veivakilai vagagalu, ka veivakacegui. E a sega ni veivakilai mosimosi kaukauwa sara. Ia a kila o Ethan ni sa, *koya* na Yalo Tabu.

A basika mai e dua na vakasama ki na vakananumu nei Ethan: “Au kila niu sa kila.” Ka ni sa vakasamataka voli, e kila rawa o koya ni a sa vakila oti eliu na veivakilai veivakacegui oqo.

Na gauna cavaga e wilika kina na iVola i Momani, e a loma vinaka ka dodonu. Oqo sa kila o koya ni veivakilai oya sai koya na Yalo Tabu ka vakadinadina voli kivua. Na gauna e laki lotu kina ka sa loma vinaka ka dodonu me tiko ekea, oya na Yalo Tabu talega. E sa rawata rawa voli o koya e dua na ivakadinadina!

E sega ni gadrevi me kila taucoko na ka o koya ena gauna saraga oqo. Ia e kila o koya ni sa ka dina na Yalo Tabu ka sa rawa ni vukei koya ena taraicake ni nona ivakadinadina.

A tekivu masu tale o Ethan. Ia na gauna oqo me sa vakavina-vinaka kina. ■

Na dauvolavola e vakaitikotiko mai Utah, Amerika.